

## ■ TRIBUNA POLITICA

# La regenza metta ils accents per la nova politica da linguas

 DA CLAUDIO LARDI,  
CUSSEGLIER GUVERNATIV

Cun deliberar la missiva en connex cun la lescha da linguas dal chantun Grischun ha la regenza grischuna dà in signal impurtant per la concepziun futura da la politica chantunala da linguas. Suenter pliras emprovas senza success durant ils onns otganta sun jau uss da buna speranza – betg l'ultim pervi da las pretensiuns e da las empermischuns a chaschun da las tractativas parlamentaras da l'artitgel da linguas en la nova constituziun chantunala – ch'igl è reussì a la regenza da sutta-metter al cussegl grond in project che vegn sustegnì da la maiorità da la populaziun grischuna.

La lescha da linguas ch'è tractandada per la sessiun d'october è il resultat da lungas ponderaziuns davart il stadi e davart il futur da la trilinguitad dal chantun Grischun. Ella ha en emprima lingua la finamira da realisar las directivas dal dretg surordinà, uschia en spezial da la constituziun federala e chantunala, e da mantegnair, proteger e pro-



mover la trilinguitad periclitada dal chantun. Abitantes ed abitants da noss chantun duain pudair communitgar cun las autoritads chantunalas en ina da las trais linguas chantunalas uffizialas; las duas linguas minoritaras rumantsch e talian duain vegnir mantegnidas e promovidas pli fitg en lur cuntinuitad ed en lur derasaziun; er en las vischnancas, en ils circuls ed en autras corporaziuns da dretg public duessi dar ina disa – anc pli gronda – che commembras e commembers da la minoritàd linguistica tradiziunala pon far diever da lur lingua materna en il contact cun autoritads ed en scola. Impurtant: L'introducziun dal rumantsch grischun sco lingua uffiziala e sco lingua da scola en las vischnancas n'è betg in object dal project.

Persunalmain hai jau grondas speranzas ed aspectativas en la debatta dal cussegl grond concernent la lescha da linguas. En vista al fatg che la lingua rumantscha è periclitada spezialmain e che la presiun da germanisaziun en il Grischun talian crescha ad in crescher ma pari impurtant che cunzunt las deputadas ed ils deputads da las valladas rumantschas resp. talianas concedian il sustegn necessari a quest project. La regenza è sa stentada d'acceptar las pretenziuns ed ils giavischs exprimids da la Rumantschia e da l'italianità en il rom da la consultaziun e da manar ad ina soluziun che resguarda las cundiziuns linguisticas e culturalas da noss chantun. La lescha da linguas è ina schanza ed a medem temp ina sfida per la politica da linguas dal chantun da furnir la cumprova che la trilinguitad e che la varietad culturala da noss chantun – ch'èn vegnidas citadas savens – existan. En quest senn è questa lescha fitg decisiva per realisar ina politica chantunala da linguas acceptabla, progressiva ed equilibrada.